

Fu *etiam* posto, per li diti, che sier Andrea Zivran, è provedador di stratioti in Histria, qual è creditor dil suo servito di le spexe se li dà al mexe, ch'è ducati 100, possi scontar con sier Francesco Zivran qu. sier Bartuzi suo parente, debitor di la Signoria nostra. E fu presa: 4 di no.

Fu posto, per li savii di Colegio, *excepto* sier Antonio Grimani procurator, sier Lunardo Mozenigo e sier Zorzi Emo, uno quarto di tansa al Monte novissimo a restituir, *ut patet*.

È questo per dar li ducati 20 milia a domino Augustin Gixi, dete a la Signoria nostra, per il marchado fece di alcuni etc. E diti danari siano ubligati a questo. Et parlò contra tal opinion di disfar el marchado sier Lunardo Mozenigo; li rispose sier Piero Balbi: parlò poi sier Zorzi Emo; li rispose sier Gasparo Malipiero savio a terra ferma. Hor andò la parte et non fu presa; sichè il marchà è rimandato, et fo comandà di questa grandissima credenza.

A di 3 la matina. Se intese, per letere di Chioza di eri sera, come è capità li uno cremonese, vien dil campo di la Bastia, over di Ferrara. Dize mercore a di ultimo spagnoli ebene la Bastia, per forza, ne la qual erano 300 tra francesi e guasconi dentro, e fono tuti taiati a pezi, *excepto* 3 che scapolono. E di tal nova la terra fo piena. *Etiam* la si ave per via di sier Piero Bembo provedador in . . .

Vene in Colegio li oratori di sguizari, a li qual prima fo leto la letera di eri, drizata a li soi capi. Laudarono, et volendo il Colegio un di loro andasse, disseno non si voler partir, perchè non hanno il camin sicuro, poi non hanno licentia di partirsi; ma la manderano per tante vie et tante che avevano. Poi disseno saper certo non sono acordati nè si acorderanno, e sanno ben il voler loro, che *omnino* è di scazar francesi de Italia etc.

Da poi disnar, fo Colegio di savii *ad consulendum*.

Noto. Ozi in Colegio, sier Andrea Trivixan el cavalier luogotenente in la Patria di Friul, va expedito senza brigata. Tolse licentia et parti poi a di 5 diti di note.

*Item*, per Colegio, fu fato la commission a sier Sebastian Zustignan el cavalier e provedador in Histria, va provedador in Dalmatia, vadi con 100 fanti et una galia, et molti capitoli di veder di aquietar quelle cosse di nobeli et popolari, *ut in ea*.

204 A di 4 domenega. La matina, vene in Colegio domino Zuan Batista Spinelli dotor et cavalier conte di Chariati, vestito di raso negro, orator dil vicerè di Napoli, qual eri zonse et è alozato a San Zorzi dove

stava el vescovo di Monopoli orator pontificio, qual eri vene a star qui a la caxa fo dil ducha di Ferrara *nunc* dil Papa, dove *etiam* habiterà l'altro orator dil Papa che si aspetta, qual a di 10 dil passato parti di Roma. Questo orator fo acompagnato da sier Francesco Donado el cavalier, sier Marco Gradenigo el dotor, sier Alvise Corner è a le raxon et sier Nicolò Lion è di Pregadi, et sier Marco Gabriel è di Pregadi, vestiti parte di scarlato. Et intrato in Colegio, sentò apresso il Principe, et presentato la letera di credenza del vicerè Don Zuan di Cardona el qual scrive la dita letera, et par ch'el manda qui dito suo orator di volontà di l'alteza dil re di Spagna etc.; poi expose l'audientia publica, comemorando esser stà qui orator a tempo di altri re passadi, et spera di bene contra francesi, perchè il vicerè à un degno et fiorito exercito in favor di la sedia apostolica etc., et doman exponeria l'audientia secreta. Il Principe lo carezoe, dicendo fusse el ben venuto, et savemo zà la condition di Soa Maestà sperimentata in altre legatione passate a la Signoria nostra; et poi parti et vene per chiezia di San Marco, e andò a caxa.

*Dil provedador Griti, fo letere di eri da Vicenza*. Come è zonte alcune burchiele numero . . . con li ponti, ma ne bisogna altre . . . le qual però si lavora fino ozi in l'arsenal, et le harà. *Item*, manda una letera auta di Mantoa di Paulo Augustini di primo dil mexe, il sumario è questo. Come sguizari non erano acordati con francesi, ma retrati per portar via il butino, e lassato le arme tutte loro a Baldasina, ch'è una terra di sguizari vicina a Belinzona, con intention di ritornar ad ogni modo. *Item*, che erano passati per Po, per i lochi di Mantova in burchi 2000 guasconi, i quali vanno a Ferrara. *Item*, che a la Bastia eri doveano dar la bataglia, et tien il marchese spagnoli l'ariano, e altre particolarità, et come in Verona era intrata la compagnia di gambareschi e altri fanti.

*Item*, fo leto una relation di uno explorator mandato per li capi di X, qual riporta con effeto sguizari esser retrati per condur via il butino, et si dice verano per la via di bergamascha; et che missier Zuan Jacomo Triulzi è rimasto a Milan al governo, et il gran mastro partito con le lanze per venir a Bologna contra spagnoll. E il dito explorator à cavalcato con zente dite d'arme fuora di Milan, fino a Marignan. *Item*, che a li Orzinuovi è la compagnia dil Contin, malmenata però da sguizari, dai qual il baron Contin fu amazato, e altre particolarità, come in essa si contien; qual di soto dirò più diffusamente il sumario di dito relatione. Et è da saper, in l'ul-